



Mette Arqe-Hammeken
Inatsisartunut ilaasortat, Naleraq

**Airdomes-inik aningaasalersuinissaq pillugu § 37 naapertorlugu apeqqummut
115/2026-mut akissuteqaat**

13-07-2026
Suliap normua 2026 - 3567
All. nr. 26633215

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Mette Arqe-Hammeken,

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaakka. Apeqqutit issuarneqartarput tamatumalu kingorna akineqarlutik.

Apeqqut 1: *Naalakkersuisut kommuninut, timersortartut kattuffiinut, timersoqatigiiffinnut imaluunniit suliniummut akisussaasuusunut allanut, Kalaallit Nunaanni airdomesinik pilersitserusuttunut, airdome qanoq ittuunersoq apeqqutaatinnagu, tapiissuteqarsinnaappat?*

Akissut: Naalakkersuisut timersortarfinnut tapiissuteqarnissamut periarfissaat Timersorneq timigissarnerlu pillugit Inatsisartut inatsisaanni nr. 15, 6. juni 2016-imeersumi (timersorneq pillugu inatsimmi) malittarisassaqaartinneqarput.

Timersorneq pillugu inatsimmi § 14, imm. 1 naapertorlugu timersortarfinnik sanaartornermut, iluarsaassinermut aaqjissuussinermullu Naalakkersuisut tapiissuteqarsinnaapput. Taamaattorli imm. 2-mi allassimavoq timersortarfinnut aaqjissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqartassasut.

Tamatuma kingunerisaanik Naalakkersuisut aallaaviatigut timersortarfinnik pilersitsinermut, tassunga ilanngullugit airdomes-inut, kommunit, timersortartut kattuffii, timersoqatigiiffiit suliniummulluunniit akisussaasut allat suliniuteqartuunersut apeqqutaatinnagit tapiissuteqarsinnaapput. Tapiissuteqartoqassappat sanaartukkap qanoq ittuussusaa pingaartinneqassaaq, suliniutit nuna tamakkerlugu nunalluunniit immikkoortuanut pingaarutillit salliunneqassallutik.

Tassunga ilanngullugu oqaatigineqassaaq Naalakkersuisut Aningaasanut inatsimmi siunertamut aningaasanik immikkoortitsisimappata taamaallaat tapiissuteqarsinnaapput.

Timersortarfinnut tunngatillugu kommunit Namminersorlutillu Oqartussat akornanni suliassat isumagisassallu agguataarnerat timersorneq pillugu inatsimmi § 14-imi aamma 16-imi erseqqissumik allassimapput. § 15-imi allassimasutut kommunalbestyrelsip timersornermut timigissarnermullu neqeroorutit pingaarnertut akisussaaffigai.

Akisussaaffik taanna tamatuma saniatigut timersorneq pillugu inatsimmi § 16-imi tapersersorneqarpoq, tassani kommunalbestyrelsi timersortarfiit sanaartornerinut,

iluarsartuunnerinut aaqqissuunnerinullu tapiissuteqarsinnaasoq allassimalluni. § 16, imm. 2 malillugu tapiissutit taamaattut najukkani timersortarfinnik sanaartornermut pingaarnertut tunniunneqartarput.

Tamanna ataatsimut isigalugu isumaqarpoq, Naalakkersuisut airdomes-inik pilersitsinissamut tapiissuteqarsinnaasut, tapiissutinili taama ittuni suliniutinut nuna tamakkerlugu nunalluunniit immikkoortuanut pingaarutillit salliunneqassapput. Tamatuma saniatigut kommunit najukkani timersortarfinnik, matumanilu illoqarfinni nunaqarfinnilu airdomes-inik ineriartortitsinissamut, pilersitsinissamut, aningaasalersornissaannut kiisalu najukkani ingerlatanut ingerlaavartumik ingerlatsinermut tapiissuteqartarnermut pingaarnertut akisussaasuupput.

Apeqquut 1 a) *Assersuutigalugu Nuummi airdome anginerusoq, 35-50 mio. kr.-it missaannik akeqassangatinneqartoq, tunngavigigutsigu, Naalakkersuisut suliniummut akisussaasuusumut qanoq annertutigisumik tapiissuteqarsinnaappat?*

Akissut: Timersorneq pillugu inatsimmi Naalakkersuisunit tapiissuteqarsinnaaneq pillugu killiliussanik aalajangersagaqanngilaq. Taamaattumik airdome-imut aalajangersimasumut tapiissutaasinnaasut annertussusaat, tassunga ilanngullugu Nuummi suliniutip 35-50 mio. kr.-nik naatsorsorneqartup sanaartornissaanut, tapiissutit qanoq annertutigisissaat inatsimmi siumoortumik aalajangersarneqarsimassanngilaq. Tassunga atatillugu erseqqissarneqassaaq Naalakkersuisut tapiissuteqarsinnaassagunik Aningaasanut inatsimmi siunertamut aningaasanik immikkoortitsisoqarsimasariaqassaaq. Taamaattumik tapiissutit annertussusissaanni aningaasaliissutit qaqugukkulluunniit immikkoortinneqartut piumasaqaateqassappallu taakkua apeqqutaassapput. 2026-mut Aningaasanut inatsimmi siunertanut taama ittunut tapiissutinik akuersissuteqartoqarsimanngilaq.

Apeqquut 1 b) *Airdome pillugu suliniut assersuutigalugu 10 mio. kr.-nik akeqassappat, Naalakkersuisut suliniummut akisussaasuusumut qanoq annertutigisumik tapiissuteqarsinnaappat?*

Akissut: Apeqquummut 1 a-mut akissutit takukkit.

Apeqquut 1 c) *Naalakkersuisut kommuninut, timersuutillit kattuffiunut, timersoqatigiiffinnut imaluunniit suliniummut akisussaasuusunut allanut, naluttarfirmik mikinerusumik airdomemik atortoqartumik imaluunniit airdomemik naluttarfittut atorneqartumik pilersitsinissamut qanoq annertutigisumik tapiissuteqarsinnaappat?*

Akissut: Apeqquummut 1 a-mut akissutit takukkit.

Apeqquut 2: *Naalakkersuisut Kalaallit Nunaanni airdomesinik pilersitsinissamut piviusunngortitsinissamut allatigut qanoq tapersiinnaanissaminnut periarfissanik takusaqarpat, matumani kommuninik,*

timersortartut kattuffiinik, timersoqatigiiffinnik imaluunniit susassaqtunik allanik suleqateqarneq ilanngullugu?

Akissut 2: Toqqaannartumik tapiissuteqanngikkaluarluni airdomes-inik piviusunngortitsinissamut tapersiinissamut, matumani ilanngullugu kommuninik, timersortartut kattuffiinik ingerlatsisunillu attuumassutilinnik allanik suleqateqarnikkut periarfissat arlallit takusinnaavakka.

Toqqaannartumik tapiissuteqarnani avataanit, assersuutigalugu aningaasaateqarfinnit, nammineq suleqatigisanit nunaniluunniit tamalaani aaqqissuussinernit aningaasalersorneqarnissaq pilerinarsarneqarsinnaavoq.

Taamatuttaaq Kalaallit Nunaanni Arsaattartut Kattuffiat (KAK) aningaasalersuinissamut periarfissat taakku qulaajarnissaannut pimoorussilluni suliaqartoq eqqumaffigaara.

Apeqqu 3: *Naalakkersuisut nunani tamalaani aningaasaateqarfinnik, Kalaallit Nunaanni airdomesinik pilersitsinissamut tapiissuteqarsinnaasunik misissuiniarpat?*

Akissut 3: Avataanit, matumani aningaasaateqarfinnit aningaasalersuinissamut periarfissat misissornissaannut tunngatillugu alloriareerpunga. Danskit ministeriinik kiisalu danskit aningaasaateqarfiinik siornatigut ataatsimiinnernut atatillugu KAK-p suliniutaa taassumalu aningaasalersorneqarnissamik pisariaqartitsinera ingerlateqqinneqarsimavoq.

Aningaasalersuinemik periarfissat pisariallit qulaajarniarlugit suliniutinillu soorlu nunatsinni airdomes-inik piviusunngortitsinissamut tunngavissat pitsanngorsarnissaannut suliaq taanna ingerlatiinnassavara.

Apeqqu 3 a) *Nunani tamalaani aningaasaateqarfiit sorliit pineqarsinnaappat?*

Akissut: Naalakkersuisut nunani tamalaani aningaasaateqarfinnik timersortarfinnik soorlu airdomes-inik pilersitsinissamut tapiissuteqarusussinnaasunik tamakkiisumik ilisimasaqanngillat. Ilisimatitsissutigineqarsinnaavorli Aningaasanut inatsimmit Lokale & Anlægsfondenimut ukiumoortumik tapiissuteqartoqartarmat, taakku ingerlatsisunit - najukkami kommunertik suleqatigalugu - sanaartormik suliniutinut tapiiffigineqarnissamut qinnuteqarfigineqarsinnaallutik. Lokale og Anlægsfonden piffissap ingerlanerani nunatsinni suliniutinut arlalinnut tapiissuteqartarsimavoq.

Apeqqu 4: *Kalaallit Nunaanni aningaasaateqarfiit sorliit Kalaallit Nunaanni airdomesinik pilersitsinissamut tapiissuteqarsinnaappat?*

Akissut 4: Naalakkersuisut nunatsinni aningaasaateqarfinnik timersortarfinnik soorlu airdomes-inik pilersitsinissamut tapiissuteqarusussinnaasunik tamakkiisumik ilisimasaqanngillat.

Apeqqu 5: *Naalakkersuisut Kalaallit Nunaanni Arsaattartut Kattuffiats aamma Kalaallit Nunaanni Timersoqatigiit Kattuffiats*

Kalaallit Nunaanni airdomesinik pilersitsinissamut suliniutaat pillugit qanoq ilisimasaqarpat?

Akissut 5: KAK-p nunatsinni airdomes-inik pilersitsinissamut suliniutaa ilisimavara. KAK-p suliniutini saqqummiunnikuuaa KAK-llu paasisassarsiorluni Finlandimut angalanermik aaqqissuussaanut atorfilittanit peqataasoqarnikuuvoq, matumani airdome-nik aaqqiissutit assigiinngitsut misissorneqarlutik.

Paatsoortoqannginnissaa anguniarlugu oqaatigineqassaaq Kalaallit Nunaanni Timersoqatigiit Kattuffiata (GIF) erseqqissaatiginikuuaa GIF-imit suliniutaanani KAK-imit suliniutaasoq.

Apeqquut 5 a) Naalakkersuisut suliniutinut taakkununga qanoq anguniagaqarpat?

Akissut: Suliniut KAK-mit saqqummiunneqartoq akuersaarpara, taamatuttaarli oqaatigineqartariaqarpoq aningaasaqarnikkut maannakkut pissutsit timersortarfiillu pioreersut qanoq issusaat eqqarsaatigalugit sanaartugassatut suliniutit ataatsikkut suliarineqarsinnaanngimmata.

Taamaattumik suliniutinik nutaanik soorlu airdomes-inik suliniutinik piviusunngortitsissagaanni aningaasalersuisussat, matumani avataanit aningaasalersuisussat aqutissiuunneqarnissaat pingaaruteqarluinnarpoq. Tamanna tunngavigalugu anguniagara tassaavoq KAK-p avataanit aningaasalersuisunik pilerisaarinissamik sulineranik tapersersornissaa, taamaalilluni suliniut ingerlatsisut allat peqatigalugit piviusunngortinneqarsinnaaqqullugu.

Inussiarnersumik inuulluaqqusillunga


Nivi Olsen